

2 TIMOTEO

Timoteodih ã túyat tútat

¹ Weém, Pablo, Jesucristoíh doonádih Dios ã naáwát tútñi jumna, nin náodih meém Timoteodih wã jwúub daác wahna caá. “Nihat Jesucristodih jepahnit wãjeéh ĩ túi jumbipna caá”, ã niijátjidih bitadih Dios weemdíh ã naóh bohéát tútatp jĩ.

² Timoteo, wã wũúh panihni ma jumuchah, meemdíh búdí wã oina caá.* Dios jwĩ íip, jwĩ Maáh Jesucristo biícđih meemdíh oinit, ĩ jĩgah en teo wáaca naáh, ma túi jummat pínah niijná.

Pablo Diosdih “Túina caá”, ã niiját

³ Diosdih úbhna, yeó jáap, chei jummat pahbut meemdíh wã úbhna caá. Pánih úbhnit, “Timoteodih búdí ma teo wáacatđih túina caá, Paá”, wãpĩ niijná caá. Caán Diosdih tigaá jwĩ nuowã wěinit, ĩpĩ jepahat pahjeh mantih, weembát caandíh wěinit, wã jepahna caá. Pánih jepahnit, dedé yeejép chãjat peéh weemdíh ã wihcatđih wã jéihna caá.

⁴ Con láa meemdíh wã cádah bejehah, ma juñátjidih náhninit, majeéh jumnit, túi weñat tút niijná, meemdíh wã jwúub eníhna caá.

⁵ Meém Jesúsđih ma túi jenah joyátđih wã náhnina caá. Ma éet Loida, ma ín Eunicebut Jesúsđih ĩt jwíih jepahap tajĩ. Pánihna, queéđih en yacnit, meembát caandíh ma túi jenah joiná caá.*

* 1:2 Hch 16.1; 1Ti 1.2 * 1:5 Hch 16.1

⁶ Meemdih wã teo jãha uúbúchah, Dios meemdih ã wêpatdih búdí át wãhup jĩ, ã wutah pah bitadiah ma túi teo wáacah pínah niijná. Páant ã chãjatjidiah náhninit, úmcanjeh, ã wêpatjĩh bitadiah chah ma teo wáacá.

⁷ Dios jwiítidiah Túini Espírituidiah át wãhup be, jwĩjeéh ã jumah pínah niijná. Pániah jwĩjeéh jumni Túini Espiritu jwiítidiah búdí ã teo wáacna caá, cãacwã ded pah ĩ jenah joyátidiah jwĩ úmcah pínah niijná. Páant ã teo wáacachah, cãacwãdiah oinit, ã wêpatjĩh queétdiah jwĩ jéih teo wáacna caá. Caán Túini Espiritujeh jwiítidiah ã túi jenah joyát túutna caá.

⁸ Pániahna, jwĩ maáih doonáidiah bitadiah naóhna, ma tíic jenah joicá bojóó. Weém áih doonáidiah wã bohéat jíib nemah múúboó wã jumuchah, wã chéen mah jumahdiahmah ma tíicca bojóó. Obohjeéhtiah, túini doonáidiah mah bohéat jíib meemdiahmah yeejép ã yapachah, “Á túimi nacaá”, mah niijí. Páant ã yapachah, Dios meemdih ã teo wáacpina caá, caandiah mah cádahcah pínah niijná.

⁹ Jwiít iiguípna bejniah déejidiah Diosjeh jwiítidiah át túi ubup wut jĩ. Pániah túi ubniah, jwiítidiah át níwip wut jĩ, áihwã jumniah, jwĩ túi chãjat pínah niijná. Obohjeéhtiah, jwĩ túi chãjat jíib át níocah wut jĩ. Nin baáciah ã chãjat pínah jãtiah ã jenah joyátjiah pah jwiítidiah oina, át níwip wut jĩ. Pániah oina, jwiítidiah túi ubniah pínah Jesucristodiah ã wah deyaah pínahdiah át jenah joyóp wut jĩ.

¹⁰ Pániah jenah joiníjiah caandiah wah deyana, ã oyatdiah jwiítidiah ã túi jéihyana caá. Páant ã wah deyani Jesús jwiít áihwãdiah iiguípna jwĩ bejah déejidiah át túi ubup wut jĩ. Caán Jesúsiah jepahna, páantjeh Dios-

jeéh jwĩ túi jumat pínah doonádih jwiít dih naáwádih
ãt dei jũúwúp wut jĩ.

11 Weemdíh ñíonit, Dios ã wahap jĩ, caán túini
doonádih wã naáwát pínah niijná.*

12 Páant ã wut atdih wã jepahatji jíib buu nin
nemat muúboó jumnit, yeejép wã yapna caá. Obo-
hjeéhtih, pánih yeejép yapna yuhna, wã tíic jenah
joicán caá. “Wã jepahni Jesús túi wěpni jumna,
ãih doonádih naáwát túatnit, weemdíh ã túi teo
wáacipna caá. Páant ã teo wáacachah, púú ã jwúub
dei jũúwúchahna, caandíh túi jenah joí cádahcan,
páantjeh ãih doonádih wã naóhbipna caá”, wã níj
jenah joiná caá.

13 Meémboó Jesucristodih túi jenah joiná,
caandíh oinit, meemdíh yoobópdih wã bohéatji
pah ma chãj cádahca bojoó.

14 Jwĩjeéh jumni Túini Espíritu ã teo wáacatjĩh
Dios meemdíh ã naáwát túatnidih yoobópdih ma
bohénaá. Caandíh túi náhninit, mácah ma bohéca
bojoó.

15 Nihat Asia baácdih moón Jesúíhwã weemdíh
cádah tigaá ãt chãjap. Pánih tigaá ã jwúub
jígohcap. Ĵjeéh Figelo, Hermógenes wut jumnitbut ã
cádahatdih ma jéihna caá.

16-17 Páant queét nihat weemdíh ã cádahachah
yuhna, Onesíforoboó dawá láa weemdíh enedih
junít, ã túi weñanap be. Nemat muúboó wã
jumuchah yuhna, Roma tútchiboó junít, wã
chéen ã jumatdih tíic jenah joicánjeh, weemdíh
maatápdih bidniji weemdíh ã bid juyúp jĩ. Páant

* 1:11 1Ti 2.7

weemdih ã táí teo wáacat jíib, ã déewãdih jwĩ Maáh ã jĩgah en teo wáaca naáh.

¹⁸ Éfeso tútchiboó jwĩ jumachah, weemdih búdí ã teo wáacatjidihbut ma táí jéihna caá. Pánihna, jwĩ Maáh Jesúsdiñ búdí wã wúbhna caá, nin baácboó jwúb dei jũóhñit, caandih búdí ã jĩgah en teo wáacat pínah niijná.

2

Jesúih táini soldado panihni

¹ Meéamboó, wã wúbh panihni, Jesucristo meemdih oinit, ã teo wáacachah, caandih ma táí péenaá.

² Dawá wã bohéatdih joiníji meem jwáh bitadiñ ma bohénaá. Páant queétdih ma bohénachah, Dios ã náahat pah táí chãjñit, bitadiñ bohé jéihñitbut ã jumanaáh.

³ Soldadodih buwat ã jumachah yuhna, ã cádahcat pah muntih, meemdihbut biíc yoobó ã yapachah, Jesúsdiñ ma cádahca bojoó. Jwiít niñat Jesúihwãdih biíc yoobó ã yapna caá.

⁴ Ded soldado ã maáhdih weñáñhna, ã wutat pahjeh caá ã chãjap. Soldado niñcanni ã chãjat pínahdiñ páantjeh chãjna, ã maáh ã wutat pah ãta jéih chãjcan tagaá. Pánihna, soldado ã chãjat pah muntih, meembút Dios ã weñat pínahdiñjeh jenah joinít, ã wutat pah ma táí chãjaá.

⁵ Pánihat dée, ded ñáoni maáta ã wutat pah táí chãjñijeh, ã wẽp ñáwat jíibdiñ ã jéih bíbohna caá.

Pánihna, ñáoni ã túi chãjat pahjeh muntih, Jesucristo ã wutat pah ma túi chãj cádahcat jíib, ã pebhna ma juibínachah, meemdíh túinidih ã wãhbipna caá.

⁶ Pánihat dée muntih, wápchi túi teoniboó ã tewat jíib jeemátdih jwíih bíbohat caá náahap. Pánihna, Dios meemdíh ã wutat pah ma túi chãjat jíib, ã pebhboó ma juibínachah, meemdíh wëinit, ã túi chãjbipna caá.

⁷ Wã niijátjidih ma túi náhninaá. Páant ma náhninachah, jwí Maáh meemdíh ã túi jéihyabipna caá.

⁸ Ded pah Jesucristo ã jumattjidih ma quíib buudcá bojoó. Caán maáh David juma át jumap wut jí. Wunna yuhna, ã jwúb boo pad júwátji túini doonádih wãpí bohénap jí.

⁹ Pánih caandíh wã bohéat jíib, yeejép chãjnitdih í nemat pah, weemdíh ítah tōpjíh chéonit, nemat muáboó í nemechah, wã moh yéejna caá. Pánih jumna yuhna, Dios naáwátdih wã bohé cádahcan níit.

¹⁰ Dios ã ñíonitdih bohéna, yeejép wãpí yapna caá, queébtut Jesucristoíhwã í jumatt pínah níijná. Áihwã iiguípna bejnit déejidih ã túi ubnit pínah í jumuchah, queét Diosjeéh í túi jumbipna caá.

¹¹ Nin naáwát yoobópdih caá:

Cristo jwí yéejat jíib ã wun wúhat pah muntih, jwiítbut ájeéh wunnit panihnit, yéejatdih cádahnit jwí jumna caá. Pánih cádahnit, ájeéh jwúb boo pad júóhnit panihnit, ájeéh páantjeh jwí jumbipna caá.

¹² Áihwã jwí jumatt jíib yeejép yapna yuhna, ã náahat pah jwí chãj cádahcan, ã maáh

jumapboó caán biícdih jwiítbut maáta jwĩ jum̄bipna caá.* Obohjeéhtih, “Jesucristodih wã jéihcan caá”, jwĩ niijíchah, caanbút jwiítbih biíc yoobó ã niijbípna caá.*

13 Jwiít jwĩ niijátji pah jwĩ chãjcah yuhna, caánboó ã niijátji pahjeh ã chãjbipna caá. Yeecanni jum̄na, ã niiját pahjeh chãjni ã jum̄na caá.

Diosdih túi teo wãhni ded pah ã jum̄at

14 Majeéh jum̄nit Jesúíhwãdih b̄uutéh wã naáwátbih ma túi náhnianaá. Dios ã enechah, queétdih ma míic jũihcat túutú. Ī jenah joyátjĩhjih ĩ míic jũihñ̄chah, dedé pínah nihcan caá. Pánih jũihna, teo wáaccan, míic yéejana caá ĩ chãjap. Ī míic jũihñ̄atbih joinít, ĩ b̄uwa jenah joiná caá.

15 Dios naáwátbih túi jéihn̄it, caán meemdih ã w̄ut̄at pah, bitadib ãih túini doonábih yoobópdih ma bohénaá. Páant ma chãjachah ennit, “Ma túi chãjna caá”, Dios ã niijíchah joinít, ma tíccan niít.

16 Diosdih jéihcannitboó ĩ jenah joyátjĩhjih ĩ míic wéhenachah, ma joyáh bojoó. Páant ĩ míic wéheat dedé pínah nihcah, chah ĩ yéej chãjbipna caá.

17 Páant ĩ yee bohéat, yahwít ã moóp aabát pah, bitadib ĩ yéejana caá. Páant tigaá Himeneo, Fileto w̄ut̄ jum̄nitbut ĩt chãjap.

18 Páant ĩ yee bohéatbih joinít, Dios naáwát yoobátbih ĩt cádahap w̄ut̄ jĩ. Pánih cádahnit, “Jesúíhwã jáantjeh ĩtát púuh laab béjep be”, queét ĩt niij yee bohénap w̄ut̄ jĩ. Pánih mácah bohénit, biquína Jesúíhwãdih ĩ yéejanachah, caandih ĩt cádahap w̄ut̄ jĩ.

* 2:12 1P 5.1 * 2:12 Mt 10.33; Lc 12.9

19 Obohjeéhtih, páant ï yee naóh bohénachah yuhna, Dios naáwátboó yoobópdih ã jumna caá. Caán ã túut numcán niít. Páantjeh biíc yoobó ã jumbipna caá. Nin pah Dios naáwát dih naóh yapani át niíj daacáp tají: “Jwí Maáh ãihwādh ã jéihna caá”, át niíj daacáp tají.* “ ‘Jesús wā Maáh caá’, niijnítboó, yeejép ï chājatdih ï cádaha naáh”, biíhboó át niíj daacáp tají.

20 Jwiít Jesúhwā nin pah caá jwí jumap: Búdí mūboó dawá pamapna ã jumna caá. Biquína oro, platajīh ï chājniji jum, biquína máa naá, wáam déepjīh ï chājnijibut ã jumna caá. Pánihna, caán mū mínah cáacwādh numah jeémpnit, ãih oro, platajīh ï chājniji pamapnadh wēi ennit, ï jeémát pínadh ã cáagna caá. Obohjeéhtih, máa naá, wáam déepjīh ï chājnijiboó yeó jáap jumat pah jeémát cáagat pínah, ï yohnidih ï yacat pínahbut ã jumna caá.

21 Pánihat pah, ded yeejép ã chājatdih cádahnit, oro, platajīh ï chājniji pamap panihni jumna, jwí Maáh ã weñat pínadh ã jéih chāj bipna caá. Páant ã chājachah, jwí Maáh caandíh ã wēi enbipna caá.

22 Meémboó jáap jumna, japata ï yéj chāj ñinahadh enna, iínít, biáboó ma bejeé. Pánih iínít, táiniboodíhjah chājna, jwí Maáh Jesúsdh chah jenah joinít, bitadh ma túi oyoó. Pánih oinít, míc jūihcanjah, ïjeéh ma túi jumū. Nihat Jesúsdh túi úbhnhitbut biíc yoobó ï chāja naáh.

23 Jenah joicánnit ï míc jūihñuchah, ma joyáh bojoó. Beh joicánjah, míc úbh joinít, queétjah chah ï míc jūihna caá.

* 2:19 Nm 16.5; Jn 10.14; 1Co 8.3

24 Obohjeéhtih, Dios naáwát dih bohéniboodíh míc jūihcat caá náahap. Pánih jūihcan, nihatdih túi chājnit, túi bohénit, bíicmantjeh íjcan túinijeh jumat caá náahap.

25 Ā naáwát dih joíihcan, mácah niijnít dih íjcanjeh túi bohéat caá náahap. Páant túinijeh ñi bohénachah joinít, Dios ā teo wáacatjīh ī yap yohatdih cádahna, túini bohéatboodíh “Caán yoobóp dih caá”, ī niīj jengah joibípna caá.

26 Pánihna, yoobóp dih bohéatdih joinít, queét nemépwā ī maáh ā náahat pah chājnitji caandíh ī cádahbipna caá. Pánih cádahnit, ā jwúub yéej chājat túutuchah yuhna, yoobóp dih bohéatdih jepahnit, ā wutaboodíh ī jepahcan níit, buca.

3

Péeni yeó jáapdih ded pah cāacwā ī jumat pínah

1 Būu, Timoteo, nindihbut ma túi náhninaá: Jesús ā jwúub dei jūúwát pínah jātih, cāacwādih búdí buwat ā jumbipna caá.

2 Caán láa, cāacwā bitadih teo wáacat pínahdih jengah joicán, ī weñat pínahdihjeh ī jengah joibípna caá. Pánih jengah joinít, dawá bíi déedih ī bidbipna caá. “Nihatdih jéihna, bitadih chah wā jumna caá”, niīj jengah joinít ī jumbipna caá. Cāacwādih, Diosdihbut yeejép wéhenit, ī mánadihbut yap yohnit ī jumbipna caá. Bitá queétdih ī túi chājachah yuhna, “Túina caá”, niijcánnit ī jumbipna caá. Diosdih wēicanjeh, búdí yeejép chājnit ī jumbipna caá.

3 Cāacwādih oican, ī jīgah en teo wáaccan níit. Yeejép doonádih naóhnit ī jumbipna caá. Ī jengah joyátjīhjeh yeejépdih ī jéih chāj cádahcan níit.

Cãacwãdih tãbit yeejép chãjnit, táiniboodíh ã en iibípna caá.

⁴ Ì chéenwãdih yuh buca yeejép ã chãjbipna caá. Jenah joicánjeh chãjnit, “Jéih beedáni caá”, niúj jenah joinít ã jumbipna caá. Queét ã weñat pínahdihjeh chãjnit jumna, Diosboodíh náahcannit ã jumbipna caá.

⁵ Cãacwã ã enechah, Diosdih táí wëinit pah jígohnit jumna yuhna, ã jenah joyátdih ã tãut nuumát pínahdih ã náahcan niít. Pánihnitdih ma pej jumca bojoó.

⁶ Biquína pánih chãjnit bitaíh munádih waadnít, “Dios naáwátdih yeebdíh bohénadiah wã jũúwúp be”, caanjíh jumnit yaádh dih ãpí niúj yeena caá. Páant ã niúj yeenachah yuhna, queét yaádh táí jenah joicánnit, yeejép chãjnit jumna, ã yee bohéátdih ã wëi joiná caá. Queét yaádh búdí ã yéej chãjnhna caá.

⁷ Pánihna, dedé mácah yee bohéátdih joíhna, Dioíh yoobópdih bohéátboodíh ã náahcan caá.

⁸ Jon jãtíh Egiptodih moón jióhnitji, Janes, Jambres wãt jumnit, Moisésdih ãt yap yohíhip wãt yuh jĩ.* Páant ã yap yohíhat pah muntih queét yaádh dih yee bohénitboó táini bohéátdih ã en iiná caá. Queét yeejépdihjeh jenah joinít ã jumna caá. Pánih jumna, Jesús dih táí jenah joicán, ãihwã yoobát ã nihcan caá.

⁹ Queét ã yee bohé jibichah yuhna, daocánnitjeh queétdih ã jepahbipna caá. ã yee bohéátdih “Caán yeejép bohéát caá”, cãacwã ã niúj jéihbipna caá. Janes, Jambresjĩh ã yeeatjidih jon jãtíh moón ã jéihyat pah muntih, Jesús ã jwúub dei jũúwát pínah

* 3:8 Ex 7.11

jātih jumnitbut ĩ yeeatdih ĩ jéihbipna caá.

Timoteodih ā jwūub wūtat

¹⁰ Obohjeéhtih, ded pah wā bohéat, wā jumat, wā jenah joyátidihbut meemjéh ma túi jéhna caá. Jesúsdiwā wā túi jenah joyátidih, íijat wihcanjeh cáacwādiwā oina wā teo wáacat, yeejép yapna yūhna wā cádahcatdihbut ma jéhna caá.

¹¹ Weemdíh yeejép ĩ chājachah, búdí wā yéej chūúátjidihbut ma jéhna caá. Antioquía, Iconio, Lистра tútchinaboó Jesúih doonádih wā jib bohéat jíib, weemdíh yeejép ĩ chājatjidihbut ma jéhna caá. Obohjeéhtih, ĩ mawíhichah yūhna, jwī Maáh Jesúsboó weemdíh ā wapachah, ĩ jéh maocap jī.*

¹² Páant weemdíh ĩ chājat pah, nihát Jesucristoíhwā caandíh ĩ túi péeat jíib, bita queétdihbut yeejép ĩ chājat pínahdihbut jwī jéhna caá.

¹³ Yeejépwā, yeenitbut chah yeejép chājnit ĩ jumbipna caá. Bitadiwā yeena, queétjehbut ĩ yeeatdih joiná, chah yeejép ĩ jumbipna caá.

¹⁴ Obohjeéhtih, ma éet, ma ín, weembút meemdíh jwī bohénachah joiná, meémboó mat túi jepahap wūtat jī. “Weemdíh bohénit yeenit nihcan caá”, níj jéhnit, yoobópdih jwī bohéatjidih túi náhninit, ma péé cádahca bojóó.

¹⁵ Meém wébít jum láa, Dios naáwátidih mat jéh jwíhip wūtat jī. Pánih jéhnit, Jesucristodih túi jepahnit, iiguípna bejni déejidih Dios ā túi ubni ma jumna caá.

¹⁶ Dios naáwátidih nihát daácnitdih “Nin pah ma níj daacá”, Diosjeh át níj daacát túutup wūtat jī. Pánihna, ĩ daacátjidih jwiútdih bohéat caá náhap,

* **3:11** Hch 13.14-52; 14.1-20

yoobópdiḥ naáwátḥiḥ jwĩ tái jéihyat túut niijná. Pániḥ jéihnit, “Caán yeejép wã chãjatḥiḥ cádahat caá náahap”, jwĩ niij jéihna caá. Caandíḥ bohéna, táiniboodíḥ jwĩ jéih túut nuumná caá. Pánihna, yeó jáap jummat pah tái chãjat túut niijná, ã naáwátḥiḥ bohéat caá náahap.

¹⁷ Ded Dios naáwátḥiḥ tái míic bohéna, nihat táinidiḥ ã jéih chãjbipna caá.

4

¹ Jesucristo, nihat cãacwã ã Maáh jwúub dei jũóhna, báadhnit, wunnitbat ded pah ã chãjatji jíib ã naóhbipna caá. Pánihna, caán, ã íip Díosbat ã enechah, meemdíḥ nin pah wã wěp naóhna caá:

² Yeó jáap jummat pah cãacwã ã joííhichah, ã joííhcah yuhna, Dios naáwátḥiḥ páantjeh ma bohénaá. Pániḥ bohéna, cãacwã ã yéej chãjatḥiḥ jéihyanit, “Jwúub yéej chãjcanjeh, táiniboodíḥ ñi túut nuumá”, ma niij naáwá. Pániḥ naóhnit, chũucánjeh, queétdiḥ ma tái bohé cádahca bojoó.

³⁻⁴ Túttimah bóo láa, cãacwã táini bohéatḥiḥ ã joííhcan níit. Pániḥ joííhcan, ã náahatḥiḥjeh chãjíhna, ã weñat pínah bohéatḥiḥjeh joííhnit, mácaḥ bohénitboodíḥ búdí ã bidbipna caá. Páant ã bidichah, dawá queétdiḥ ã yee bohébipna caá. Túini bohéatḥiḥ cádahnit, mácaḥ bohénit ã jenah joyátjĩhneh ã bohéatboodíḥ ã joibípna caá. Pánihna, waícanjeh páant ã yapat pínahdiḥ jéihnit, meémboó Dios naáwát, yoobópdiḥ jumnidih, ma bohé cádahca bojoó.

⁵ Pániḥ bohénit, queét yeenit pah chãjcat túut niijná, tái jenah joiní ma jumúú. Yeejép yapna yuhna, bíic yoobó chãjnit, táini doonádiḥ ma bohé

cádahca bojoó. Pánih cádahcan, Dios meemdíh ã wutát pah ma túi chãj péanaá.

⁶ Weém Dios ã wutát pah, ã naáwát dih wã jib bohéatji jíib weemdíh ã mao yohat pínah bahnijeh caá ã jũhdũp.

⁷ Wã wunat pínah jãtíh nin pah meemdíh wã naóhna caá: Jesúih túini doonádih Dios weemdíh ã bohéat túutuchah, wã túi bohénap be. Nihat ã wutát pah wã chãj péanap be. Pánih chãjnit, yeejép yapna yuhna, caandíh wã túi jenah joí cádahcap be.

⁸ Pánihna, wã túi chãjatji jíib jwĩ Maáh jeáboó ã bíboh pãina nacaá. Nihat cáacwã ded pah ã chãjatdih jéih beedána, yoobópdih jíib wũhni jumna, ã wutát dih wã túi jepahatji jíib, ã jwũub dei jũóhni yeó jáapdih weemdíh ã túi chãjbipna caá. Bitá caandíh oinitbut ã jwũub dei jũúwát pínahdih túi pãinit ã jumuchah, jwĩ Maáh Jesús biíc yoobó queédih ã túi chãjbipna caá.

Timoteo ded pah ã chãjat pínah

⁹ Waícanjeh wã pebhna ma jũúwá.

¹⁰ Demas wũt jumni chah dawá bií déedih náahna, weemdíh cádahnit, Tesalónica tútchina ã jwũub bejep be.* Crescente wũt jumni Galacia baácna ã bejehah, Tito wũt jumni but Dalmacia baácna ã bejep be.*

¹¹ Páant ã yoh bejat túttimah, Lucasjeh caá wãjeéh ã chãwáp.* Pánihna, bitá teo wáacnitdih náahnit, meemdíh wã jũúwát túutna caá. Pánih jũóhnit, Marcosdihbut ma numah jũúwá.* Cristoíh

* **4:10** Col 4.14; Flm 24 * **4:10** 2Co 8.23; Gá 2.3; Tit 1.4 * **4:11**

Col 4.14; Flm 24 * **4:11** Hch 12.12,25; 13.13; 15.37-39; Col 4.10; Flm 24

doonádih wã bohénachah, weemdíh túi teo wáacni pínah caán ã jumbipna caá.

¹² Tíquicodih Éfeso tútchina wã wahap be.*

¹³ Ninna jãóhna, Troas tútchiboó* Carpo wūt jumniíh mūdih wã jwej jãóhni cúbuh jweyát chóodih, wíih papélah tólihnadihbut ma ub jũúwú. Wíih papélah núonadih bácah búdí wã náahna caá. Pánihna, caandíhbut ma ub jũúwú.

¹⁴ Alejandro wūt jumni ítahdih teoni weemdíh búdí yeejép ã chãjap be.* Páant ã chãjatji jíib Dios caandíh ã peéh chãjbipna caá.*

¹⁵ Caán Alejandro jwí bohéatdih búdí ã yap yohna caá. Pánihna, caandíh ma túi chãja chaáh, meemdíh yeejép ã chãjcat pínah niijná.

¹⁶ Roma tútchidih moón í maáta weemdíh í jwíih wúbh joyóchah, wã chãjatjidih wã bohéatdihbut queétdih wã naáwáchah, det weemdíh teo wáacnit pínah í wihcap be. Ëmmnit, nihat weemdíh í cádah bejep be. Obohjeéhtih, páant weemdíh í cádahachah yuhna, Dios queétdih ã peéh chãjca bojo naáh.

¹⁷ Weemdíh páant í cádahachah yuhna, jwí Maáh Jesúsboó ã teo wáacap be, áih doonádih wã naóh beedáat pínah niijná, nihat judíowã nihcannit í joyát pínah niijná. Jiowã panihnit weemdíh í mao yohat déedih ã túi wapap be.

¹⁸ Nihat weemdíh yeejép chãjnitdih yap yohnit, jwí Maáh weemdíh ã wapbipna caá. Pánih wapnit, jeáboó maáh ã jumapna weemdíh ã túi bejat tútbutipna caá. Pánihna, yeó jáap jummat pah “Caán

* **4:12** Hch 20.4; Ef 6.21-22; Col 4.7-8 * **4:13** Hch 20.6 * **4:14**
1Ti 1.20 * **4:14** Sal 62.12; Ro 2.6

chah túini, chah wēpni Maáh caá”, jwĩ niij jĩh.
Páant tií ã jumna nah.

Ã péé túyat tútat

¹⁹ Prisca, Aquila,* Onesíforo* ã pebh moonbút ã túya naáh.

²⁰ Erasto* Corinto tútchiboó ã chāwáp jĩ.
Trófimo* Mileto tútchiboó tábáp chāhñit, ã
chāwáp jĩ.

²¹ Meémboó mah noój láa jãtìh waícanjeh ma
jūúwá. Eubulo, Pudente, Lino, Claudia, nihat bita
Jesúihwãbut meemdíh ã túyat túttna caá.

²² Jwĩ Maáh Jesucristo majeéh ã jumna naáh. Dios
yeéb nihatdih oinit, ã táí teo wáaca naáh.

Páant bóojeh tigaá wã naáwát.

Pablo

* **4:19** Hch 18.2,18 * **4:19** 2Ti 1.16-17 * **4:20** Hch 19.22; Ro
16.23 * **4:20** Hch 20.4; 21.29

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2